



Les premiers naiz d'Israël sont sanctifiez à Dieu, en commemoration de leur deliurance.

R le temps que les enfans d'Israël habiterent en Egypte, fut quatre cens trente ans: dont le Seigneur voulut que Moysé en fist obseruer vne commemoration & qu'on luy sanctifiast tous les premiers naiz, ouurans la matrice d'entre ceux d'Israël, tant des hommes que des bestes, car toutes choses sont au Seigneur. Moysé donc dist au peuple, Ayez souuenance du iour auquel vous estes sortis d'Egypte, car le Seigneur vous en a retirez par la force de sa main; afin que ne mangiez point de pain leué, vous sortez au mois des nouveaux fructs. Et quand le Seigneur vous aura conduits en la terre promise par iurement à vos peres, ayant affluence de lait & de miel, vous ferez ce seruire en ce mois par sept iours, auquel vous mangerez du pain sans leuain, & le septième sera la solemnité du Seigneur. Et en ce iour vous annoncerez à vos enfans les graces que le Seigneur a fait en ces iours-là, vous ayant retirez de seruitude d'entre les Egyptiens. Il vous sera doncques pour signe, comme quelque chose pendant deuant vos yeux: Et vous mettrez à part tous les premiers naiz males, tant des hommes que des bestes, & les consacrez au Seigneur, & les luy immolerez, vous racheterez le premier nay de l'homme à prix d'argent, & le premier nay d'une asnesse; vous le racheterez d'une brebis. Or quand Pharaon eut laissé aller le peuple d'Israël, il ne fut pas conduit par la terre des Philistins, euitans la rencontre d'eux, mais par le desert qui est prés la mer Rouge. Or Moysé prit avec soy les os de Ioseph, ainsi qu'il auoit fait iurer à ses freres, de les emporter lors que Dieu les visiteroit.

Exode 13. Cha.